



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13, 89/16, 5/22 i 31/24) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj: 103/08, 5/22 i 39/25), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2022. GODINU STRANKE ZA BOSNU I HERCEGOVINU

Broj: 03-07-6-488/23
Sarajevo, 25.12.2025. godine

S A D R Ź A J

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	6
5.1 NALAZI.....	6
5.2 PREPORUKE	16

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Stranke za Bosnu i Hercegovinu za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2022. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2022. godinu, utvrđeno je da je Stranka za Bosnu i Hercegovinu prekršila odredbe člana 4. stav (1), člana 5. stav (4), člana 8. stav (1) i (4), člana 11. i člana 12. stav (1), stav (3) i stav (4) Zakona o finansiranju političkih stranaka i odredbe člana 15.1 stav (1) Izbornog zakona Bosne i Hercegovine.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Stranke za Bosnu i Hercegovinu za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2022. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2022. godinu, Stranka za Bosnu i Hercegovinu se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	8.745,35	1,69
2.	Prilozi fizičkih lica (3-a)	81.353,00	15,70
3.	Prilozi pravnih lica (3-b)	14.500,00	2,80
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	10.367,85	2,00
7.	Prihodi iz budžeta (3-f)	397.066,54	76,64
8.	Prihodi od propagande (3-g)	0,00	0,00
I	Ukupni prihodi (1-8)	512.032,74	98,83
II	Ostali prihodi i drugo	6.083,86	1,17
	Izvori finansiranja (I+II)	518.116,60	100,00

U godišnjem finansijskom izvještaju za 2022. godinu Stranka za Bosnu i Hercegovinu je iskazala rashode u ukupnom iznosu od 743.120,81 KM.

2. PREDSTAVLJANJE POLITIČKE STRANKE

Naziv političke stranke je Stranka za Bosnu i Hercegovinu. Skraćeni naziv političke stranke je SBIH.

Stranka za Bosnu i Hercegovinu je Rješenjem broj: R-I-2/96 od 25.04.1996. godine upisana u registar Višeg suda u Sarajevu, a potom rješenjima Općinskog suda u Sarajevu u registar su upisane promjene lica ovlaštenog za zastupanje stranke i njenog sjedišta u Sarajevu.

Sjedište političke stranke je u Sarajevu, Trg Fra Grge Martića 2/II. Prema aktu broj: 51/21 od 27.05.2021. godine koji je politička stranka dostavila Centralnoj izbornoj komisiji Bosne i Hercegovine sjedište političke stranke je u Ulici Reisa Džemaludina Čauševića 2/I.

Lice ovlašteno za zastupanje stranke u 2022. godini je Semir Efendić.

Lice ovlašteno za podnošenje finansijskih izvještaja za 2022. godinu je Semir Efendić.

Prema podacima iz godišnjeg finansijskog izvještaja za 2022. godinu, organizacionu strukturu Stranke za Bosnu i Hercegovinu čine:

- Centrala SBIH,
- Fondacija SBIH,

- 2 kluba poslanika SBIH¹,
- RO SBIH S. Vakuf,
- 8 kantonalnih vijeća,
- Gradski savjet SBIH Mostar,
- 65 općinskih/opštinskih odbora/savjeta i
- SBIH Banja Luka.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Stranke za Bosnu i Hercegovinu za 2022. godinu i finansijski izvještaj za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2022. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka, te da li je troškove izborne kampanje ostvarila u okviru zakonom utvrđenog limita.

Obim pregleda i kontrole finansijskog izvještaja Stranke za Bosnu i Hercegovinu obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju obavila je reviziju i pregled finansijskih izvještaja Stranke za Bosnu i Hercegovinu u periodu od 2005. do 2021. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci.

Nakon izvršenog pregleda godišnjeg finansijskog izvještaja za 2021. godinu, Služba za reviziju je izdala Izvještaj o pregledu sa mišljenjem revizora, nalazima revizije i preporukama stranci: da sačini program utroška sredstava na način kojim bi se obezbijedila transparentnost planiranog trošenja sredstava, kao i uporedba ostvarenih troškova sa planiranim, te da finansijska sredstva obezbijeđena za finansiranje stranke koristi u skladu sa programom utroška sredstava, da u skladu sa odredbom člana 5. stav (4) Zakona o finansiranju političkih stranaka, sve priloge prijavljuje u finansijskom izvještaju, da vodi evidenciju o priložima, izdaje potvrde o primljenim priložima i da dobrovoljne priloge u novcu uplaćuje na transakcijski račun Centrale stranke. Takođe, preporučeno je da uspostavi interne kontrole unutar stranke, odnosno kontrolu nad nižim organizacionim dijelovima stranke, radi sprečavanja pogrešnog evidentiranja prihoda i rashoda, te zloupotrebe finansijskih sredstava, da vodi poslovne knjige u skladu sa računovodstvenim propisima, da uspostavi pravilne i potpune evidencije o prihodima, rashodima i obavezama, da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka i da dostavlja dodatnu dokumentaciju. Političkoj stranci je preporučeno i da izvrši usaglašavanje obaveza sa dobavljačima, te provede odgovarajuća knjiženja u svojim poslovnim knjigama.

Nerealizovane preporuke:

Na osnovu uočenih nedostataka u godišnjem finansijskom izvještaju za 2022. godinu, utvrđeno je da Stranka za Bosnu i Hercegovinu nije ispoštovala preporuke.

¹ Klub poslanika FBIH i Klub poslanika BIH.

5. NALAZI I PREPORUKE

5.1 NALAZI

a) Stranka za Bosnu i Hercegovinu nije postupila u skladu sa odredbama člana 4. stav (1) Zakona o finansiranju političkih stranaka².

- (1) Stranka za Bosnu i Hercegovinu je u godišnjem finansijskom izvještaju za 2022. godinu, iskazala rashode u ukupnom iznosu od 743.120,81 KM.

Programom utroška sredstava za 2022. godinu, politička stranka je planirala ukupne rashode u iznosu 731.368,00 KM.

Politička stranka je dostavila Odluku o Rebalansu programa utroška, broj 255/22 od 09.11.2022. godine koji nije uzet u razmatranje, jer je donesen u periodu kada su troškovi u 2022. godini već bili poznati.

Analizom Plana utroška sredstava za 2022. godinu i podataka iz godišnjeg finansijskog izvještaja za 2022. godinu, utvrđeno je da je stranka sredstva u iznosu od 117.626,04 KM ostvarila mimo plana utroška sredstava za 2022. godinu, i to:

- Stranka za Bosnu i Hercegovinu je ostvarila troškove ostalih zakupnina u iznosu od 7.282,19 KM, troškove ugovora o djelu u iznosu od 16.121,61 KM, humanitarne rashode u iznosu od 1.800,00 KM, troškove električne energije u iznosu od 1.920,61 KM, koje nije planirala programom utroška sredstava.
- Stranka za Bosnu i Hercegovinu je prekoračila planirane troškove kampanje za 39.807,42 KM, troškove takse, novčane kazne i sl. za 15.686,79 KM, troškove zakupnine poslovnih prostora za 29.402,44 KM i troškove reprezentacije za 5.604,98 KM.

Politička stranka je planirala troškove kampanje u iznosu od 388.000,00 KM, troškove takse u iznosu od 4.400,00 KM, troškove zakupnine poslovnih prostora u iznosu od 55.000,00 KM i troškove reprezentacije u iznosu od 38.000,00 KM.

U godišnjem finansijskom izvještaju stranka je iskazala troškove kampanje u iznosu od 427.807,42 KM, troškove takse, novčane kazne i sl. u iznosu od 20.086,79 KM, troškove zakupnine poslovnih prostora u iznosu od 84.402,44 KM i troškove reprezentacije u iznosu od 43.604,98 KM.

- Plan utroška sredstava za 2022. godinu nije sačinjen na način kojim bi se obezbijedila transparentnost planiranog trošenja sredstava, kao i uporedba ostvarenih troškova sa planiranim. Naime, u postupku pregleda nije bilo moguće utvrditi u kojem iznosu su planirani troškovi poštarine i internet usluga, troškovi telefona (mobilni telefon), troškovi komunalnih usluga, troškovi knjigovodstvenih usluga i troškovi usluga.

Planom utroška sredstava za 2022. godinu, politička stranka je planirala PTT i komunalne usluge u iznosu od 28.000,00 KM i troškove usluga u iznosu od 77.968,00 KM. U godišnjem finansijskom izvještaju stranka je iskazala troškove poštarine i internet usluga u iznosu od 8.546,72 KM, troškove telefona (mobilni telefon) u iznosu od 238,55 KM, troškove komunalnih usluga u iznosu od 1.618,98 KM, troškove knjigovodstvenih usluga u iznosu od 9.572,00 KM i troškove usluga u iznosu od 19.908,95 KM.

- (2) Troškove goriva, u iznosu od 27.042,74 KM, politička stranka je u poslovnim knjigama i finansijskom izvještaju evidentirala na osnovu gotovinskih računa različitih dobavljača. Uvidom u dostavljene račune utvrđeno je da se iz istih ne može utvrditi u koje svrhe je utrošeno gorivo, kao ni podatke o licu koje je preuzelo gorivo.

² Finansijska sredstva iz člana 3. stav (1) Zakona o finansiranju političkih stranaka, politička stranka može koristiti isključivo za ostvarivanje ciljeva utvrđenim svojim programom i statutom.

S obzirom da Stranka za Bosnu i Hercegovinu nije sačinila plan na način kojim bi se obezbijedila transparentnost planiranog trošenja sredstava, kao i uporedba ostvarenih troškova sa planiranim, te da je finansijska sredstva u iznosu od 117.626,04 KM utrošila mimo utvrđenog programa utroška sredstava, dok se za sredstva u iznosu od 27.042,74 KM ne može sa sigurnošću utvrditi u koju svrhu su utrošena, prekršene su odredbe člana 4. stav (1) Zakona o finansiranju političkih stranka.

b) Stranka za Bosnu i Hercegovinu prekršila je odredbe člana 5. stav (4) i člana 8. stav (1) Zakona o finansiranju političkih stranaka.

Stranka za Bosnu i Hercegovinu u poslovnim knjigama nije evidentirala i u godišnjem finansijskom izvještaju nije iskazala priloge fizičkih i pravnih lica, nenovčane donacije po osnovu besplatnog korištenja poslovnih prostora, besplatnih objava na društvenoj mreži „Facebook“, besplatnog korištenja reklamnih površina („billboard“, „wallscape“, „megaboard“ i „led display“) i besplatnog korištenja sala i dvorana za održavanje predizbornih skupova i tribina tokom kampanje, čime je prekršila odredbu člana 5. stav (4) Zakona o finansiranju političkih stranaka.

Politička stranka je, takođe, primila priloge anonimnih donatora, općina i javnih preduzeća, što je suprotno odredbi člana 8. stav (1) Zakona o finansiranju političkih stranaka.

- (1) Stranka za Bosnu i Hercegovinu nije uspostavila potpune i tačne evidencije o svojim priložima te u godišnjem finansijskom izvještaju nije iskazala prilog fizičkog lica Amer Sejkanović u iznosu od 100,00 KM.

Kontrolom izvoda sa transakcijskog računa utvrđeno je da je fizičko lice Amer Sejkanović dana 03.08.2022. godine na račun stranke uplatilo prilog u iznosu od 100,00 KM koji politička stranka nije u godišnjem finansijskom izvještaju iskazala i nije evidentirala u poslovnim knjigama, čime je prekršila odredbe člana 5. stav (4) Zakona o finansiranju političkih stranaka.

- (2) Stranka za Bosnu i Hercegovinu nije u poslovnim knjigama evidentirala i u godišnjem finansijskom izvještaju nije prijavila nenovčanu donaciju po osnovu besplatnog korištenja poslovnog prostora u vlasništvu općine Jablanica.

Uvidom u akt Općine Jablanica, broj 01-19-4-1990/23 od 22.09.2023. godine utvrđeno je da je politička stranka u Jablanici bez naknade koristila poslovni prostor površine 21,15 m² u vlasništvu Općine Jablanica.

- (3) Stranka za Bosnu i Hercegovinu nije u poslovnim knjigama i godišnjem finansijskom izvještaju iskazala nenovčane donacije po osnovu besplatnih objava na društvenoj mreži „Facebook“, čime je prekršila odredbe člana 5. stav (4) Zakona o finansiranju političkih stranaka.

Uvidom u raspoloživu dokumentaciju utvrđeno je da Stranka za Bosnu i Hercegovinu nije uspostavila evidenciju u poslovnim knjigama i nije prijavila u finansijskom izvještaju nenovčane donacije koje je ostvarila promocijom stranke i njenih kandidata putem društvene mreže „Facebook“ gdje je prema podacima sa platforme „AdLibrary“, objavljeno 171 oglasa ukupne vrijednosti 6.794,00 KM.

- Prema raspoloživim podacima utvrđeno je da su putem društvene mreže „Facebook“ fizička lica promovisala stranku i njene kandidate na Općim izborima 2022. godine, kako slijedi: Semir Efendić u iznosu od 2.495,00 KM, Haris Peljto u iznosu od 479,00 KM, Emir Malkić u iznosu od 254,00 KM, Faruk Dozić u iznosu od 100,00 KM, Ernad Deljić u iznosu od 603,00 KM, Nedim Selimović u iznosu od 811,00 KM, Aleksandar Aničić u iznosu od 388,00 KM, Nedžada Tolja u iznosu od 192,00 KM, Šejla Imamović u iznosu od 172 KM, Jusuf Halilović u iznosu od 215,00 KM, Emma Fejzić u iznosu od 109,00 KM i Aldin Selman u iznosu od 100,00 KM, a koje stranka nije prijavila u godišnjem finansijskom izvještaju.
- Uvidom u podatke sa platforme „AdLibrary“ utvrđeno je da je pravno lice „Digitalk“ putem društvene mreže „Facebook“ promovisalo stranku i njene kandidate putem oglašavanja na društvenim mrežama u iznosu od 776,00 KM, a koje stranka nije prijavila u godišnjem finansijskom izvještaju.

- Na osnovu dostavljenih podataka utvrđeno je da je jedan oglas vrijednosti od 100,00 KM objavljen od strane anonimnog donatora. S obzirom da politička stranka nije platila uslugu objave na društvenoj mreži „Facebook“, niti je u postupku revizije predložena dokumentacija na osnovu koje bi se utvrdio identitet donatora koji je izvršio plaćanje objava, Stranka za Bosnu i Hercegovinu je ostvarila nenovčanu donaciju anonimnog donatora, što je suprotno odredbama člana 8. stav (1) Zakona o finansiranju političkih stranaka.

- (4) Pregledom podataka koji je dostavio „Transparency International BiH“ i dokumentacije o troškovima zakupa sala i dvorana, koje je u toku obavljanje revizije predložila politička stranka, utvrđeno je da je politička stranka koristila sale, dvorane i opremu za održavanje predizbornih skupova i tribina tokom kampanje za Opće izbore 2022. godine u Novom Travniku (Sala Općine Novi Travnik) i Živinicama (BKC Živinice), te da za korištenje nije platila naknadu.

S obzirom da politička stranka nije evidentirala troškove iznajmljivanja prostora, te da iste nije platila, ostvarila je nenovčane donacije nepoznatih donatora, čime je prekršila odredbe člana 5. stav (4) i člana 8. stav (1) Zakona o finansiranju političkih stranaka.

- (5) Uvidom u podatke o oglašavanju putem reklamnih površina na Općim izborima 2022. godine, koje je dostavio „Transparency International BiH“, utvrđeno je da je Stranka za Bosnu i Hercegovinu tokom izborne kampanje 2022. godine koristila reklamne površine u Bihaću (1 „billboard“), Sarajevu (3 „billboard“ i 1 „wallscape“ u općini Centar Sarajevu, 3 „billboard“ i 1 „led display“ u općini Novo Sarajevo, 7 „billboard“, 1 „led display“, 1 „megaboard“ i 7 „wallscape“ u općini Novi Grad Sarajevo i 2 „led display“ u općini Stari Grad Sarajevo), Fojnici (1 „wallscape“), Goraždu (1 „billboard“), Mostaru (1 „wallscape“ i 1 „megaboard“), Hadžićima (2 „billboard“), Ilidži (11 „billboard“ i 1 „led display“), Jablanici (1 „billboard“), Kalesiji (1 „billboard“ i 1 „megaboard“), Konjicu (1 „megaboard“), Tuzli (4 „billboard“ i 1 „led display“), Vogošći (1 „billboard“ i 2 „led display“), Zavidovićima (1 „led display“), Zenici (2 „led display“), Žepču (1 „billboard“) i Živinicama (1 „led display“) za koje politička stranka nema dokumentaciju.

Činjenica da je „Transparency International BiH“ evidentirao reklamne površine na kojima se oglašavala stranka, a da stranka nema dokumentaciju o zakupu reklamnih površina na 62 lokacije³, ukazuje da je stranka u toku predizborne kampanje besplatno koristila reklamne površine, odnosno da je ostvarila nenovčane donacije procijenjene vrijednosti od 50.000,00 KM⁴.

Politička stranka u poslovnim knjigama nije evidentirala i u finansijskom izvještaju nije prijavila nenovčane donacije donatora čiji identitet nije poznat, čime je prekršila odredbe člana 5. stav (4) i člana 8. stav (1) tačka e) Zakona o finansiranju političkih stranaka.

- (6) Stranka za Bosnu i Hercegovinu nije u godišnjem finansijskom izvještaju prijavila nenovčane donacije koje je ostvarila po osnovu zakupa reklamnih površina po povoljnijim uslovima, čime je prekršila odredbe člana 5. stav (4) Zakona o finansiranju političkih stranaka.

- Politička stranka nije u godišnjem finansijskom izvještaju prijavila nenovčanu donaciju pravnog lica „Plakat“ d.o.o. Sarajevo po osnovu zakupa 55 reklamnih površina („billboard“, „city light“, „backlight“, „superboard“ i „led display“) po povoljnijim uslovima. Dobavljač „Plakat“ d.o.o. Sarajevo je za zakup 55 reklamnih površina u periodu od 07.09.2022. do 04.10.2022. godine izdao fakturu br. 132-12/2022 od 14.12.2022. godine u iznosu od 28.321,02 KM. Uvidom u fakturu dobavljača utvrđeno je da je dobavljač političkoj stranci odobrio rabat od 35,00%, odnosno 13.034,00 KM. Na osnovu navedenog, utvrđeno je da je stranka ostvarila nenovčanu donaciju pravnog lica „Plakat“ d.o.o. Sarajevo u iznosu od 13.034,00 KM, koju je trebala evidentirati u poslovnim knjigama, te prijaviti u finansijskom izvještaju.

³ Oglašavanje na sljedećim reklamnim površinama: 36 „billboard“, 10 „wallscape“, 4 „megaboard“ i 12 „led display“.

⁴ Prilikom obračuna iznosa nenovčanih donacija uzeta je cijena zakupa reklamnih površina prema cjenovniku dobavljača „Dibs 98 oprema“ d.o.o. Bihać za „billboard“ u iznosu od 800,00 KM i „led display“ u iznosu od 600,00 KM, dok je za zakup „wallscape“/„megaboard“ uzeta cijena u iznosu od 1.000,00 KM prema podacima sa računa dobavljača „Max media“ d.o.o. Sarajevo.

- Politička stranka nije u godišnjem finansijskom izvještaju prijavila nenovčanu donaciju pravnog lica „Silvermoon“ d.o.o. Sarajevo po osnovu zakupa 2 reklamna prostora („led display“) po povoljnijim uslovima. Dobavljač „Silvermoon“ d.o.o. Sarajevo je za zakup 4 reklamna prostora u periodu od jednog mjeseca izdao fakturu br. 00018/2 od 26.08.2022. godine u iznosu od 9.360,00 KM. Uvidom u fakturu utvrđeno je da je dobavljač političkoj stranci odobrio besplatno korištenje dvije dodatne reklamne pozicije u ukupnom iznosu od 4.680,00 KM.

Na osnovu navedenog, utvrđeno je da je stranka ostvarila nenovčanu donaciju pravnog lica „Silvermoon“ d.o.o. Sarajevo u iznosu od 4.680,00 KM, koju je trebala evidentirati u poslovnim knjigama, te prijaviti u finansijskom izvještaju.

c) Stranka za Bosnu i Hercegovinu prekršila je odredbe člana 8. stav (4) Zakona o finansiranju političkih stranaka.

Stranka za Bosnu i Hercegovinu je u toku 2022. godine primila priloge u iznosu od 11.000,00 KM od pravnih lica koja su imala zaključene ugovore o javnoj nabavci roba i radova sa organima izvršne vlasti, čija je vrijednost veća od 10.000,00 KM, čime su prekršene odredbe člana 8. stav (4) Zakona o finansiranju političkih stranaka.

- Stranka za Bosnu i Hercegovinu je dana 19.05.2022. godine, primila prilog pravnog lica „EFTim TUZLIĆ“ d.o.o. Zavidovići u iznosu od 10.000,00 KM. Uvidom u podatke koje su dostavili Grad Zavidovići i Grad Zenica, utvrđeno je da je pravno lice „EFTim TUZLIĆ“ d.o.o. Zavidovići, u toku 2022. godine, imalo zaključen ugovor o javnoj nabavci roba sa Gradom Zavidovići u vrijednosti od 13.146,21 KM, dok je sa Gradom Zenica imalo zaključen Okvirni sporazum za nabavku i sukcesivnu isporuku radioničkog, građevinskog i ostalog materijala za potrebe Grada Zenica vrijednosti od 22.230,00 KM.
- Prilog pravnog lica „Amitea“ d.o.o. Mostar u iznosu od 1.000,00 KM, Stranka za Bosnu i Hercegovinu je primila dana 05.09.2022. godine. Uvidom u akt, broj: 02-32-862-1/25 od 12.05.2025. godine koji je dostavilo Federalno ministarstvo raseljenih osoba i izbjeglica, utvrđeno je da je pravno lice „Amitea“ d.o.o. Mostar tokom 2022. godine, imalo zaključeno više ugovora o javnim nabavkama radova u vrijednosti većoj od 10.000,00 KM.

Takođe, a na osnovu podataka koje je dostavio Grad Mostar utvrđeno je da je pravno lice „Amitea“ d.o.o. Mostar u toku 2022. godine imalo zaključen Ugovor o javnoj nabavci radova na rekonstrukciji i dogradnji vodovodne mreže u vrijednosti od 598.797,51 KM.

d) Stranka za Bosnu i Hercegovinu prekršila je odredbe člana 11. stav (1) i stav (2) i člana 12. stav (1), stav (3) i stav (4) Zakona o finansiranju političkih stranaka.

Politička stranka nije vodila poslovne knjige u skladu sa računovodstvenim propisima, nije vodila pravilne i potpune evidencije o svojim prihodima, rashodima, obavezama i novčanim tokovima, nije postupila po principima blagajničkog poslovanja i obrasce godišnjeg finansijskog izvještaja nije popunila u skladu sa Pravilnikom o godišnjim finansijskim izvještajima političkih stranaka (u daljem tekstu: Pravilnik), čime je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka. Pregledom godišnjeg finansijskog izvještaja utvrđeno je da politička stranka nije uspostavila interne kontrole, čime je prekršila odredbe člana 11. stav (2) Zakona o finansiranju političkih stranaka.

- (1) Pregledom finansijskih izvještaja utvrđeno je da stranka nije uspostavila sistem internih kontrola, čime je prekršila odredbe člana 11. Zakona o finansiranju političkih stranaka.

Politička stranka nije poslovne knjige vodila u skladu sa važećim Pravilnikom o kontnom okviru i sadržaju konta za neprofitne organizacije, dok je troškove takse za prijavu za učešće na Općim izborima 2022. godine u poslovnim knjigama evidentirala suprotno računovodstvenim propisima.

Politička stranka je dana 24.12.2021. godine donijela Pravilnik o finansijskom poslovanju. Uvidom u finansijsku dokumentaciju i finansijsko poslovanje, utvrđeno je da politička stranka ne

provodi svoje interne akte odnosno da nema uspostavljene unutrašnje finansijske kontrole kako bi spriječila pogrešno evidentiranje prihoda i rashoda. Politička stranka nije, u godišnjem finansijskom izvještaju za 2022. godinu, prijavila sve transakcijske račune kao ni promet ostvaren po istim, niti je evidentirala i prijavila sve prihode i rashode.

U skladu sa članom 11. stav (2) Zakona o finansiranju političkih stranaka, stranka je dužna da svojim internim aktima uredi sistem unutrašnje finansijske kontrole nad nižim organizacionim dijelovima radi sprečavanja pogrešnog evidentiranja prihoda i rashoda, te zloupotrebe finansijskih sredstava.

- (2) Stranka za Bosnu i Hercegovinu nije u poslovnim knjigama evidentirala i u obrascu 2 (pregled prometa svih transakcijskih računa političke stranke) godišnjeg finansijskog izvještaja nije prijavila sve transakcijske račune i nije pravilno prijavila promet ostvaren po transakcijskim računima, čime je prekršila računovodstvene propise i odredbe člana 11. Pravilnika.

- Kontrolom izvoda sa transakcijskih računa političke stranke utvrđeno je da stranka nije pravilno prijavila promet po transakcijskim računima Centrale, OO SBIH Novi Travnik i OO SBIH Čelić.

1. Stranka za Bosnu i Hercegovinu je u obrascu 2 godišnjeg finansijskog izvještaja iskazala transakcijski račun Centrale, broj: 3387302207653650 kod UniCredit bank d.d. Sarajevo sa početnim stanjem u iznosu od 0,00 KM, ukupnim ulazima u iznosu od 220.830,10 KM, ukupnim izlazima u iznosu od 220.852,08 KM i stanjem na dan 31.12.2022. godine u iznosu od -17,98 KM.

Kontrolom izvoda sa navedenog računa utvrđeno je da je u 2022. godini politička stranka ostvarila promet i to: početno stanje u iznosu od 0,00 KM, promet ulaza u iznosu od 220.830,10 KM, promet izlaza u iznosu od 220.842,08 KM i stanje na dan 31.12.2022. godine u iznosu od -7,98 KM.

2. Politička stranka je u obrascu 2 godišnjeg finansijskog izvještaja iskazala transakcijski račun OO SBIH Novi Travnik, broj: 3387302207621543 kod UniCredit bank d.d. Sarajevo sa početnim stanjem u iznosu od 0,00 KM, ukupnim ulazima u iznosu od 3.152,75 KM, ukupnim izlazima u iznosu od 3.590,01 KM i stanjem na dan 31.12.2022. godine je u iznosu od -437,26 KM.

Kontrolom izvoda sa navedenog računa utvrđeno je da je politička stranka u toku 2022. godine po ovom transakcijskom računu ostvarila sljedeći promet: početni saldo 0,00 KM, ukupan promet ulaza u iznosu od 4.750,00 KM, ukupan promet izlaza u iznosu od 4.678,00 KM i saldo na dan 31.12.2022. godine u iznosu od 72,00 KM.

3. Politička stranka je u obrascu 2 godišnjeg finansijskog izvještaja iskazala transakcijski račun OO SBIH Čelić, broj: 3387302207626005 kod UniCredit bank d.d. Sarajevo sa početnim stanjem u iznosu od 0,00 KM, ukupnim izlazima u iznosu od 100,00 KM i stanjem na dan 31.12.2022. godine u iznosu od -100,00 KM.

Kontrolom izvoda sa transakcijskog računa broj: 3387302207626005 utvrđeno je da na transakcijskom računu nije bilo sredstava na dan 01.01.2022. godine, da je ukupan promet izlaza iznosio 120,00 KM, a da je saldo na dan 31.12.2022. godine negativan u iznosu od 120,00 KM.

- Stranka za Bosnu i Hercegovinu nije u godišnjem finansijskom izvještaju prijavila transakcijski račun broj: 1340100000093919 otvoren kod ASA banke d.d. Sarajevo.

Uvidom u službene podatke o sredstvima isplaćenim političkim strankama iz budžeta Zeničko-dobojskog kantona u toku 2022. godine utvrđeno je da stranka na navedeni transakcijski račun primila sredstva iz budžeta Zeničko-dobojskog kantona u iznosu od 3.365,08 KM.

- Politička stranka je u godišnjem finansijskom izvještaju iskazala dva puta transakcijski račun broj: 3387302207624259 otvoren kod UniCredit Bank d.d. Sarajevo.

Politička stranka je u obrascu 2 iskazala transakcijski račun O SBIH Živinice broj: 3387302207624259 otvoren kod UniCredit Bank d.d. Sarajevo, sa sljedećim prometom i stanjem: početno stanje u iznosu od 0,00 KM, ukupan promet ulaza u iznosu od 1.200,00 KM, ukupan promet izlaza u iznosu od 664,60 KM i stanje na dan 31.12.2022. godine u iznosu od 535,40 KM, što odgovara podacima iz izvoda sa transakcijskog računa.

Stranka za Bosnu i Hercegovinu je, međutim, isti transakcijski račun, broj: 3387302207624259 otvoren kod UniCredit Bank d.d. Sarajevo, iskazala i kao transakcijski račun O SBIH Gradačac, te je iskazala sljedeće podatke o prometu i stanju: početno stanje u iznosu od 0,00 KM, ukupan promet ulaza u iznosu od 0,00 KM, ukupan promet izlaza u iznosu od 120,00 KM i stanje na dan 31.12.2022. godine u iznosu od -120,00 KM.

Uvidom u dostavljenu dokumentaciju utvrđeno je da O SBIH Gradačac ima transakcijski račun broj: 3387302207635996 kod UniCredit Bank d.d. Sarajevo, ali da isti politička stranka nije iskazala u obrascu 2. Prema podacima iz izvoda sa ovog računa početno stanje iznosilo je 0,00 KM, ukupan promet ulaza 0,00 KM, ukupan promet izlaza 120,00 KM, a stanje na dan 31.12.2022. godine -120,00 KM.

- Stranka za Bosnu i Hercegovinu nije u godišnjem finansijskom izvještaju prijavila transakcijski račun broj: 1415455320004081 kod BBI Banke d.d. Sarajevo, transakcijski račun broj: 5540080001128818 kod Naše Banke a.d. Bijeljina i transakcijski račun broj: 5673631900094196 kod Atos Bank a.d. Banja Luka.
- Uvidom u poslovne knjige utvrđeno je da je Stranka za Bosnu i Hercegovinu u godišnjem finansijskom izvještaju prijavila transakcijske račune za OO SBIH DC Brčko, OO SBIH Ključ, KV SBIH Tuzla, OO SBIH Tuzla, OO SBIH Gračanica, OO SBIH Kladanj, OO SBIH Kakanj, OO SBIH Tešanj i OO SBIH Konjic, čije stanje i promet ne odgovaraju podacima iz poslovnih knjiga. Isto tako, politička stranka je u obrascu 2 iskazala dva transakcijska računa OO SBIH Zavidovići, a koji nisu evidentirani u poslovnim knjigama.

- (3) Na osnovu dostavljenih blagajničkih dnevnika za OO SBIH Konjic, OO SBIH Novi Grad i Centrala Sarajevo utvrđeno je da stranka nije vodila blagajnu u skladu sa pravilima i principima blagajničkog poslovanja.

Nalozi isplate iz blagajne nisu potpisani od strane lica koje je primilo novac i lica koje je isplatilo novac iz blagajne.

Uvidom u dnevnike blagajne za 2022. godinu utvrđeno je da su isti sačinjeni periodično (mjesečno, sedmično i sl.), a ne na dan kada su se promjene desila, što je suprotno računovodstvenim propisima, te da nisu potpisani od strane blagajnika i kontrolora.

- (4) Uvidom u potvrde o primljenim priložima koje je stranka izdala fizičkim licima, utvrđeno je da potvrde ne sadrže naziv političke stranke i mjesto prebivališta/sjedišta donatora, te potpis ovlaštenog lica.

U skladu sa odredbama iz člana 6. Pravilnika, politička stranka je dužna svakom fizičkom i pravnom licu od kojeg je primila članarinu ili prilog izdati potvrdu u kojoj su sadržani sljedeći podaci: naziv političke stranke, serijski broj potvrde, ukupan iznos članarine/priloga, ime i prezime/naziv donatora, broj ličnog dokumenta/identifikacioni broj donatora, adresa i mjesto prebivališta/sjedišta donatora, datum uplate, datum izdavanja potvrde i potpis ovlaštenog lica.

- (5) Stranka za Bosnu i Hercegovinu nije u poslovnim knjigama uspostavila i u godišnjem finansijskom izvještaju nije iskazala potpune i tačne podatke o svojim prihodima, čime je prekršila računovodstvene propise, odredbe člana 11. Zakona o finansiranju političkih stranka i odredbe člana 13, 14, 18. i 19. Pravilnika.

- Politička stranka nije u godišnjem finansijskom izvještaju iskazala i u poslovnim knjigama nije evidentirala prilog fizičkog lica Amer Sejkanović u iznosu od 100,00 KM, čime je prekršila odredbe člana 13. i 14. Pravilnika.

- Stranka za Bosnu i Hercegovinu je prilog fizičkog lica Melita Skenderović u iznosu od 400,00 KM u godišnjem finansijskom izvještaju iskazala kao članarinu, čime je prekršila odredbe člana 13. i 14. Pravilnika.
- U obrascu 3 (izvori finansiranja) i 3-e (nenovčane donacije i računi koje stranka nije imala obavezu platiti) godišnjeg finansijskog izvještaja stranka nije iskazala nenovčane donacije pravnih lica „Plakat“ d.o.o. Sarajevo i „Silvermoon“ d.o.o. Sarajevo, nenovčane donacije po osnovu besplatnog korištenja poslovnih prostora, te sala i dvorana za održavanje predizbornih skupova, besplatnog oglašavanja na društvenoj mreži „Facebook“ i oglašavanje putem reklamnih površina („billboard“, „wallscape“, „megaboard“ i „led display“) tokom izborne kampanje 2022. godine, čime je prekršila odredbe člana 13. i 18. Pravilnika.

(6) Uvidom u dostavljene podatke o isplaćenim sredstvima iz budžeta svih nivoa vlasti u Bosni i Hercegovini, te kontrolom izvoda sa transakcijskih računa političke stranke, utvrđeno je da politička stranka nije u godišnjem finansijskom izvještaju pravilno iskazala prihode iz budžeta.

- U godišnjem finansijskom izvještaju politička stranka je pogrešno iskazala prihode iz budžeta Republike Srpske, Zeničko-dobojskog i Tuzlanskog kantona, te gradova i općina: Mostar, Tuzla, Kupres i Ključ.

Politička stranka je u obrascu 3-f iskazala prihode iz budžeta Republike Srpske u iznosu od 59.498,82 KM, Zeničko-dobojskog kantona u iznosu od 19.224,76 KM, Tuzlanskog kantona u iznosu od 27.483,03 KM, te budžeta gradova i općina: Mostar u iznosu od 9.682,71 KM, Tuzla u iznosu od 35.190,38 KM, Kupres u iznosu od 4.155,59 KM i Ključ u iznosu od 1.671,43 KM. Kontrolom izvoda sa transakcijskih računa, utvrđeno je da je politička stranka iz budžeta Republike Srpske primila sredstva u iznosu od 54.451,20 KM, Zeničko-dobojskog kantona u iznosu od 13.460,32 KM, Tuzlanskog kantona u iznosu od 28.319,00 KM, te budžeta gradova i općina: Mostar u iznosu od 3.688,88 KM, Tuzla u iznosu od 37.657,06 KM, Kupres u iznosu od 852,94 KM i Ključ u iznosu od 1.532,15 KM.

- Stranka za Bosnu i Hercegovinu je u obrascu 3-f godišnjeg finansijskog izvještaja prihode iz budžeta Općine Doboj Istok u iznosu od 756,00 KM i budžeta Općine Novi Grad Sarajevo u iznosu od 56.316,81 KM iskazala kao prihode iz budžeta Općine Doboj Jug u iznosu od 756,00 KM i budžeta Opštine Novi Grad u iznosu od 56.316,81 KM.

Uvidom u raspoloživu dokumentaciju utvrđeno da Općina Doboj Jug i Opština Novi Grad nisu, u toku 2022. godine, isplatile sredstva Stranci za Bosnu i Hercegovinu.

- Uvidom u akt Kantona Sarajevo, broj: 15-04-4887/23 od 23.02.2023. godine, utvrđeno da su u 2022. godini iz budžeta Kantona političkoj stranci uplaćena sredstva u iznosu od 9.162,06 KM. Stranka za Bosnu i Hercegovinu nije u godišnjem finansijskom izvještaju iskazala prihod iz budžeta Kantona Sarajevo.

(7) Politička stranka u poslovnim knjigama nije uspostavila potpune i tačne evidencije o svojim rashodima, čime je prekršila odredbe člana 21. i 22. Pravilnika.

- Politička stranka nije iskazala troškove zakupa poslovnih prostora koje je koristila u Bihaću, Jajcu, Tešnju, Novom Travniku, Visokom i Ilidži.

Uvidom u dostavljene ugovore utvrđeno je da godišnji troškovi zakupa poslovnih prostora u Bihaću iznose 612,48 KM, Jajcu 648,84 KM, Tešnju 780,00 KM, Novom Travniku 3.600,00 KM, Visokom 450,00 KM i Ilidži 1.750,00 KM.

Takođe, politička stranka nije iskazala troškove zakupa poslovnog prostora u općini Jablanica koji je koristila bez naknade.

- Stranka za Bosnu i Hercegovinu nije u godišnjem finansijskom izvještaju iskazala tačne podatke o troškovima zakupa poslovnih prostora koje je koristila Centrala stranke, te organizacioni dijelovi stranke u Mostaru, Konjicu, Travniku, Zenici, Kaknju, Tuzli, Goraždu i Živinicama.

1. Politička stranka je u godišnjem finansijskom izvještaju iskazala troškove zakupa poslovnog prostora koji je koristila Centrala stranke u iznosu od 62.590,85 KM.

Na osnovu dostavljenih ugovora o zakupu poslovnih prostora utvrđeno je da su troškovi zakupa poslovnog prostora koje je koristila Centrala stranke iznosili 35.351,04 KM.

Pored navedenog, a uvidom u poslovne knjige političke stranke utvrđeno je da politička stranka nije evidentirala i u godišnjem izvještaju nije iskazala troškove zakupa poslovnog prostora za decembar 2022. godine. Takođe je utvrđeno da je politička stranka troškove zakupa iz ranijih godina u iznosu od 7.207,69 KM iskazala kao troškove zakupa tekućeg perioda.

2. Politička stranka je troškove zakupa poslovnog prostora u Konjicu iskazala u iznosu od 3.324,44 KM. Uvidom u ugovor o zakupu poslovnog prostora i poslovne knjige stranke utvrđeno je da troškovi zakupa poslovnog prostora za 2022. godinu iznose 2.849,52 KM, te da je politička stranka troškove zakupa iz ranijih godina u iznosu od 474,92 KM iskazala kao troškove zakupa poslovnog prostora tekućeg perioda.

3. Stranka za Bosnu i Hercegovinu je u godišnjem finansijskom izvještaju iskazala troškove zakupa poslovnog prostora u Travniku u iznosu od 3.260,62 KM. Uvidom u ugovor o zakupu poslovnog prostora u Travniku i poslovne knjige stranke utvrđeno je da troškovi zakupa poslovnog prostora iznose 2.340,00 KM.

4. Politička stranka je troškove zakupa poslovnih prostora u Mostaru, Zenici, Kaknju, Tuzli i Živinicama iskazala u manjem iznosu od ostvarenih i to: Mostaru za 3.300,00 KM, Zenici za 3.520,00 KM, Kaknju za 693,16 KM, Tuzli za 2.459,96 KM i Živinicama za 49,28 KM.

Takođe je utvrđeno da je politička stranka troškove zakupa poslovnog prostora u Goraždu iskazala u većem iznosu za 49,28 KM.

(8) Stranka za Bosnu i Hercegovinu nije u poslovnim knjigama i godišnjem finansijskom izvještaju iskazala tačne i potpune podatke o troškovima izborne kampanje, čime je prekršila odredbe člana 21. i 23. Pravilnika.

U obrascu 4.2 (troškovi propagande) godišnjeg finansijskog izvještaja politička stranka je iskazala troškove propagande u ukupnom iznosu od 427.807,42 KM.

- Uvidom u dostavljenu dokumentaciju utvrđeno je da je politička stranka u obrascu 4.1 (režijsko-administrativni i ostali troškovi) godišnjeg finansijskog izvještaja iskazala troškove zakupa sala u periodu izborne kampanje⁵ kao troškove ostale zakupnine u ukupnom iznosu od 3.390,75 KM. Stranka je navedene troškove trebala iskazati u obrascu 4.2 (troškovi propagande).
- Stranka za Bosnu i Hercegovinu je u obrascu 4.1 godišnjeg finansijskog izvještaja iskazala troškove usluga u iznosu 2.758,50 KM.

Uvidom u račune dobavljača „Hukić turs“ d.o.o. Ilidža, broj: 392/22 od 23.09.2022. godine u iznosu od 877,50 KM i A.S. „Gare“ d.o.o. Zavidovići, broj: 93/22 od 05.10.2022. godine u iznosu od 819,00 KM za usluge prevoza, račun dobavljača „Kalman“ d.o.o. Sarajevo, broj 424/22 od 30.09.2022. godine u iznosu od 702,00 KM za predstavljanje kandidata na radiju i račun dobavljača TR „Amadeus techno shop“ Konjic, broj 22-303-000118 od 14.09.2022. godine u iznosu od 360,00 KM za propagandni materijal, utvrđeno je da se isti odnose na troškove izborne kampanje, te je politička stranka troškove u iznosu od 2.758,50 KM trebala iskazati u obrascu 4.2 (troškovi propagande).

- Stranka je troškove zakupa sale u Općini Stari Grad Sarajevo dana 19.09.2022. godine, evidentirala dva puta, na dva različita konta, čime je troškove kampanje iskazala u većem iznosu za 2.500,00 KM u odnosu na ostvarene.

⁵ Troškovi zakupa sala u Općini Centar u iznosu od 2.018,25 KM, Gradu Tuzla 12,00 KM, Narodnom univerzitetu Konjic 175,50 KM, „Futura Line“ 468,00 KM, „Tuzla-remont“ d.o.o. Tuzla, Hotel „Salis“ 300,00 KM, „Tehnograd-company“ d.o.o. Tuzla 300,00 KM i „Dom mladih“ Trebinje 117,00 KM.

- Politička stranka u svojim poslovnim knjigama i finansijskom izvještaju nije iskazala troškove zakupa reklamnih površina („billboard“, „wallscape“, „megaboard“ i „led display“), čime je troškove kampanje iskazala u manjem iznosu za 50.000,00 KM u odnosu na ostvarene.

„Transparency International BiH“ je Centralnoj izbornoj komisiji Bosne i Hercegovine dostavio podatke o oglašavanju na Općim izborima 2022. godine, dok je politička stranka tokom obavljanja pregleda finansijskih izvještaja predočila podatke o zakupu reklamnih površina za vanjsko oglašavanje. Pregledom raspoložive dokumentacije utvrđeno je da se politička stranka oglašavala na više lokacija, a da nema dokumentaciju o plaćanju za 62 lokacije (36 „billboard“, 10 „wallscape“, 4 „megaboard“ i 12 „led display“), procijenjene vrijednosti 50.000,00 KM.

Pored navedenog, utvrđeno je da se Stranka za Bosnu i Hercegovinu tokom izborne kampanje 2022. godine oglašavala putem „billboard“ i „led display“ u vlasništvu pravnih lica „Max media“ d.o.o. Sarajevo i „Total media“ d.o.o. Sarajevo, koji nisu evidentirani kao dobavljači u poslovnim knjigama, što, takođe, ukazuje da stranka nije izvršila plaćanje za oglašavanje na reklamnim površinama.

- Politička stranka je u poslovnim knjigama i godišnjem finansijskom izvještaju troškove zakupa 55 reklamnih površina za „billboard“, „city light“, „backlight“ i „led display“ iskazala u manjem iznosu u odnosu na stvarne za 13.034,00 KM. Kao što je u navedeno u nalazu pod b), dobavljač „Plakat“ d.o.o. Sarajevo je za zakup 55 površina stranci odobrio rabat od 35%, odnosno ukupno 13.034,00 KM.
- Stranka za Bosnu i Hercegovinu je u poslovnim knjigama i godišnjem finansijskom izvještaju troškove zakupa 6 reklamnih površina za „led display“ iskazala u manjem iznosu u odnosu na stvarne za 4.680,00 KM. Kao što je u navedeno u nalazu pod b), dobavljač „Silvermoon“ d.o.o. Sarajevo je za zakup 4 reklamne površine političkoj stranci odobrio besplatno korištenje dvije dodatne reklamne površine u iznosu od 4.680,00 KM.
- Politička stranka nije u godišnjem finansijskom izvještaju iskazala troškove izborne kampanje po osnovu objava na društvenoj mreži „Facebook“ u vrijednosti od 6.794,00 KM⁶.
- Stranka za Bosnu i Hercegovinu nije evidentirala u poslovnim knjigama niti iskazala u godišnjem finansijskom izvještaju troškove zakupa sala i dvorana koje je politička stranka koristila tokom kampanje za Opće izbore 2022. godine u Novom Travniku (Sala Opštine Novi Travnik) i Živinicama (BKC Živnice).

(9) Stranka za Bosnu i Hercegovinu nije u poslovnim knjigama i godišnjem finansijskom izvještaju iskazala tačne i potpune podatke o svojim obavezama, čime je prekršila odredbe člana 24. Pravilnika.

- Politička stranka nije u poslovnim knjigama i godišnjem finansijskom izvještaju iskazala obaveze prema Općini Travnik. Uvidom u Sporazum o izmirenju duga po osnovu zakupa općinskih poslovnih prostora broj: 01-04-01-57-1422/21 od 05.08.2022. godine, utvrđeno je da je politička stranka, u trenutku zaključivanja Sporazuma, imala obavezu prema Općini Travnik u iznosu od 21.766,39 KM, te da se obavezala da će istu izmiriti u 36 jednakih rata u iznosu od 604,62 KM u periodu od 01.02.2022. godine do 01.02.2025. godine. Stranka za Bosnu i Hercegovinu je u toku 2022. godine izvršila 10 plaćanja po osnovu Sporazuma koje je iskazala kao troškove zakupnine poslovnog prostora OO SBIH Travnik, ali u poslovnim knjigama nije evidentirala i u godišnjem finansijskom izvještaju nije iskazala preostali dio obaveza prema Općini Travnik.

Navedeno ukazuje da politička stranka nema pravilne i tačne evidencije o svojim obavezama.

- Stranka za Bosnu i Hercegovinu je u godišnjem finansijskom izvještaju u obrascu 5.2 (ostale obaveze) iskazala obaveze prema ostalim dobavljačima u iznosu od 86.026,42 KM. U skladu sa članom 24. Pravilnika, stranka je dužna u obrascu 5.2 iskazati obaveze prema svakom dobavljaču pojedinačno.

⁶ Kao što je navedeno u nalazu pod b) tačka 1.

- Politička stranka je u godišnjem finansijskom izvještaju iskazala obaveze prema dobavljaču „Plakat“ d.o.o. Sarajevo u iznosu od 28.321,02 KM i prema dobavljaču Općina Stari Grad Sarajevo u iznosu od 8.798,91 KM.

Uvidom u dostavljene izvode otvorenih stavki, utvrđeno je da obaveze političke stranke na dan 31.12.2022. godine prema pravnom licu „Plakat“ d.o.o. Sarajevo iznose 28.521,42 KM, a obaveze prema Općini Stari Grad Sarajevo iznose 9.844,04 KM.

- (10) Stranka za Bosnu i Hercegovinu u postizbornom finansijskom izvještaju nije iskazala sve nenovčane donacije i troškove izborne kampanje, čime je prekršila odredbe člana 12. stav (3) Zakona o finansiranju političkih stranka, člana 15.1 stav (1) Izbornog zakona Bosne i Hercegovine i odredbe Pravilnika o predizbornim i postizbornim finansijskim izvještajima političkih stranaka („Službeni glasnik BiH“ broj: 10/18 i 5/22).

- (11) Pregledom finansijske dokumentacije političke stranke, utvrđeni su nedostaci kod računa dobavljača, koji su knjigovodstvene isprave o nastalim poslovnim događajima⁷.

- Uvidom u račun dobavljača UR „Muharemović“, Sarajevo br. 17/22 od 11.10.2022. godine u iznosu od 2.350,00 KM utvrđeno je da se isti odnosi na ugostiteljske usluge, odnosno konzumaciju jela i pića, ali ne sadrži specifikaciju izvršenih usluga.

- Stranka za Bosnu i Hercegovinu je na osnovu predračuna u poslovnim knjigama i godišnjem finansijskom izvještaju iskazala troškove reprezentacije i ostalih zakupa što je suprotno računovodstvenim propisima i standardima.

Politička stranka je na osnovu predračuna dobavljača TU „Neretva-Rafting“ Konjic, vlasnik Đ.K., broj: 2409/22 od 23.10.2022. godine u iznosu od 5.475,60 KM iskazala troškove reprezentacije.

Isto tako, politička stranka je na osnovu predračuna dobavljača Narodni univerzitet Konjic broj: 10/2022 od 05.09.2022. godine u iznosu od 175,50 KM iskazala troškove ostalih zakupa.

Troškovi izborne kampanje

Prema odredbama člana 15.10 Izbornog zakona Bosne i Hercegovine politička stranka za potrebe izborne kampanje ne smije potrošiti više od 0,30 odnosno 0,20 KM⁸ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Stranka za Bosnu i Hercegovinu je u svrhu izborne kampanje za Lokalne izbore 2022. godine mogla potrošiti sredstva u iznosu od 1.542.013,70 KM.

Pored iskazanih troškova izborne kampanje u iznosu od 427.807,42 KM, u toku obavljanja pregleda utvrđeno je da je Stranka za Bosnu i Hercegovinu ostvarila i troškove izborne kampanje u iznosu od 78.157,25 KM⁹.

Naime, politička stranka je troškove izborne kampanje u iznosu od 6.149,25 KM umjesto u obrascu 4.2, iskazala u obrascu 4.1 godišnjeg finansijskog izvještaja, dok troškove izborne kampanje u iznosu od 72.008,00 KM uopšte nije iskazala u godišnjem finansijskom izvještaju za 2022. godinu.

⁷ U skladu sa računovodstvenim propisima, knjigovodstvena isprava mora biti potpuna, istinita, računski tačna i uredna, sačinjena tako da omogućava potpun uvid u vjerodostojnost dokumenta. Sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.

⁸ Član 15.10 stav (2) propisuje da se maksimalno politički subjekt koji ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove narodne skupštine RS i Predstavnički dom Parlamenta FBiH, članove Parlamentarne skupštine BiH, člana Predsjedništva BiH, predsjednika i podpredsjednika RS, odnosno 20 feninga za izbore za članove kantonalnih skupština.

⁹ Ovaj iznos nije konačan jer nisu iskazani troškovi korištenja sala i dvorana tokom kampanje za Opće izbore 2022. godine.

5.2 PREPORUKE

Preporučuje se Stranci za Bosnu i Hercegovinu da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da sačini program utroška sredstava na način kojim bi se obezbijedila transparentnost planiranog trošenja sredstava, kao i uporedba ostvarenih troškova sa planiranim, te da finansijska sredstva obezbijedena za finansiranje stranke koristi u skladu sa programom utroška sredstava,*
- *da u skladu sa odredbom člana 5. stav (4) Zakona o finansiranju političkih stranaka, sve priloge prijavljuje u finansijskom izvještaju,*
- *da vodi evidenciju o priložima i izdaje potvrde o primljenim priložima u skladu sa članom 6. Pravilnika,*
- *da se ne finansira iz zabranjenih izvora,*
- *da uspostavi interne kontrole unutar stranke, odnosno kontrolu nad nižim organizacionim dijelovima stranke, radi sprečavanja pogrešnog evidentiranja prihoda i rashoda, te zloupotrebe finansijskih sredstava,*
- *da vodi poslovne knjige u skladu sa računovodstvenim propisima, odnosno da uspostavi pravilne i potpune evidencije o novčanim tokovima, prihodima, rashodima i obavezama,*
- *da finansijske izvještaje koje podnosi Centralnoj izornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka,*
- *da blagajničko poslovanje uspostavi u skladu sa principima i pravilima blagajničkog poslovanja i*
- *da izvrši usaglašavanje obaveza sa dobavljačima, te provede odgovarajuća knjiženja u svojim poslovnim knjigama.*

KOMENTAR:

Stranka za Bosnu i Hercegovinu je, u ostavljenom roku, dostavila primjedbe na Preliminarni izvještaj o pregledu godišnjeg finansijskog izvještaja za 2022. godinu. Politička stranka je uz primjedbe dostavila dokaze o implementaciji oglašivačke kampanje za izbore 2022. godine pravnog lica „Hud Hud Pro“ vl. Softić Nevres Sarajevo, lokacije reklamnih površina pravnih lica: „Cromax“ d.o.o. Čelić, „Inžinjeri“ d.o.o. Goražde i „Art“ Agencija za pružanje marketing usluga Kakanj, te Ugovor o zakupu poslovnog prostora u Općini Novi Grad Sarajevo i potvrde o primljenim donacijama.

Služba za reviziju je uvažila sve argumentovane primjedbe političke stranke, te je u skladu sa istima korigovala nalaze revizije iz Preliminarnog izvještaja o pregledu godišnjeg finansijskog izvještaja za 2022. godinu.

Šef Odsjeka za revizijske poslove

Sanja Tošović

Revizor

Tanja Golijanin